

第一部 起動

身為唯一 bat tī 潛水艇服役 ê 總統，當 2004 年美國海軍潛水艇 “USS 吉米·卡特 (Jimmy Carter)” 舉行落水典禮 ê 時，我感覺特別榮幸。阮祈禱 chit 台真特別 ê 海軍軍艦 ē-tàng tī 國家中間帶來平安 kah 和諧。

起動一台船 kah 起動一個基督徒 ê 生活有真 chē 所在全款。一台潛水艇 tui 建造 ê 碼頭轉到浸 tī 海中，這可能是她 ê 性命中 siōng 有意義 ê 時刻，m̄-koh，其它 ê tak 個坎站 mā lóng 真重要，包括設計、創造 kah 測試。

類似 ê 情形是，若 beh 享受成功 ê 基督徒生活，而且起動進入至 koân 上帝呼召咱去行 ê 大冒險，咱需要建立一個適當 ê 基礎，koh 用正確 ê 材料起造，而且對咱最終 ê 使命有一個好 ê 了解。Tī chit-ê siōng 頭先 ê 第一部，咱 beh 專注 tī chē-chē 起造一個豐盛基

督徒 ê 關鍵部分。咱 beh 認真思考一個以上帝做中心 ê 生活，tī 上帝 ê 疼內面來歡喜，默想恩典 kah 信仰，思考不斷 ê 告白 kah 悔改 ê 需要，討論耶穌基督 ê 重要作用，以及祂 ê 死亡 kah koh 活，並且期待 kah 祂永活。

當咱準備 kah 起造好勢，咱已經為家已備辦一個驚動人 ê 起動，進入一個成功 ê 基督徒人生。咱 kah 上帝同行 ê 時，啥人會知影有啥物奇妙 ê 機會 kah 嚴峻 ê 挑戰會 tī 咱 ê 人生旅程中 teh thèng 候咱？當咱有真妥當 ê 起造，咱 tòh ē-tàng 隨時面對任何咱所 tú-tiòh ê tāi-chì。上帝迫切要求你 kah 我 tiòh 用祂 ê Kiáⁿ 耶穌基督，就是聖經所講 ê 咱 ê 地基，來起造咱全部 ê 人生。

「因為上帝已經 hē 耶穌基督做唯一 ê 地基，以外無別個地基。」(《全民台語聖經》哥林多前書 3：11)。